


TEZAU LITURGIC

23 AUGUST

SLUJBA SF. IERARH-MUCENIC IRINEU, EPISCOPUL LUGDUNUMULUI



MOSCOVA, 2000



Августа в 23-й день Служба священномученику Иринею Лионскому

На вечерни

На Господи возвах: **стихиры праздника, глас 1:**
О, дивное чудо! / Источник Жизни / во гробе
полагается, / и лествица к Небесей гроб бывает. /
Веселися, Гефсимание, / Богородичен святой
доме. / Возопием, вернии, / Гавриила имущее
чиноначальника: / Благодатная, радуйся, / с
Тобою Господь, // подай мируи Тобою велию
милость.

Дивны Твоя тайны, Богородице: / Вышняго
престол / явилася еси, Владычице, / и от земли
к Небеси преставилася еси днесь. / Слава
Твойбоголепная, / богоподобными сияющи
чудесы. / Девы с Материю Царевою, / на высоту
вознеситесь. / Благодатная, радуйся, / с Тобою
Господь, // подай мируи Тобою велию
милость.

Твое славят uspение / Власти и Престоли, /
Начала и Господства, / Силы и Херувими и
страшнии Серафими, / радуются земнороднии,
/ о Божественней Твоей славе красящися, /
припадают людие со Архангелы и Ангелы и
воспевают: / Благодатная, радуйся, / с Тобою

Господь, // подай миру Тобою велию милость.

Стихиры святителю, глас 1:

Запад сиянии мысленными ты восток соделал еси, / проповедуя Солнце Правды, от Девы нам возсиявшее, / и, зашед страданьми мученическими, отче Иринее, / возсиял еси к Свету невечернему, / идеже, зеркалом разрешшимся, // зриши желаемую красоту Христа твоего, Богоблаженне.

Догматов светлостью и жития красотою / благочестно удобрил еси священноначалие, Иринее Богомудре, / и Церкви столп явился еси истинно, / просвещая вся словесы твоими. / Тем ты ублажаем священными песньми // и всечестную празднуем память твою.

Веры евангельския поборника, / блаженнаго Поликарпа сотаинника, / благочестия учителя, / священническаго жития доброе правило, / Лиона архипастыря славнаго, / святителей украшение и христиан утешителя, / нищих помощника и питателя, // восхвалим днесь Иринея досточуднаго.

Слава, глас 4:

Торжествуй днесь радостно, Лионе, / ликуй и веселися, Церковь Божия, / празднующи память Иринея Богомудраго, / песньми духовными

восхваляючи его и вопиючи: / не забуди люди твоя на земли, отче священнейший, / и всякую душу к тебе притекающую, / но присно моли Христа Бога, // во еже спасти всех нас.

И ныне, Успению, глас тойже:

Приидите, воспоем, людие, / Пресвятую Деву Чистую, / из Неяже неизреченно пройде, / воплощся, Слово Отчее, / зовуще и глаголюще: / благословенна Ты в женах, / блаженное чрево, вместившее Христа. / Того святым рукам душу предавши, // молися, Пречистая, спаситися душам нашим.

На стиховне стихиры праздника, глас 2:

Подобен: ДOME Евфрафов:

Вси Небеснии лица, / радостно воспойте, / ибо Дева Мати / преставися преславно // от земли к Небесным.

Стих: Воскресни, Господи, в покой Твой, / Ты и Кивот святыни Твоея.

Песньми Твое честное / и богоприятное тело / Божественнии апостоли / провождающе, вопияху: // где ныне отходиши, Владычице?

Стих: КлятсЯ Господь Давиду истиною / и не отвержется ея.

Земля убо Твоим погребением / благословися, Дево, / воздух же восхождением / освятися странным, // законом умерши естества.

Слава, глас и подобен тойже:

Троицы вернаго служителя, / Церкви
свещильника всесветлаго, / Иринея отца
предивнаго / ныне, в память его сошедшеся, //
воспоим любовь.

И ныне, Успению, глас и подобен тойже:

Собор ученик / и Божественных апостолов /
погребсти собрася / богоприятное тело //
единыя Богоматере.

Тропарь Успению, глас 1:

В рождестве девство сохранила еси, / во
успении мира не оставила еси, Богородице, /
преставилася еси к животу, Мати суци Живота,
// и молитвами Твоими избавлявши от смерти
души наша.

Тропарь святителю, глас 4:

Апостолов сопрестольник и святителей
украшение / был еси, Ирине Богоблаженне, /
мученически прославився, / возсиял еси, якоже
солнце, всех просвещая, / и разрушил еси
безбожия ночь глубокую. / Сего ради тя
почитаем, // яко велика таиника Божия
благодати.

Иной тропарь святителю, глас 1:

Брег морской Азии Малья / рождеством и
юностию твоими хвалится, / славне
священномучениче Иринее, / и град Лионский,

/ сильным огражденный предстательством твоим, / величает милосердаго Бога нашего. / Галлия ликует / о мучении твоём за Христа, / вся же Церковь Православная / непрестано радуется, / чистотою учения утверждённая, / егоже проповедал еси, / миром Христовым духовныя бури уставив, // яже обыдоша души наша.

На утрени

По 1-й стихологии седален, глас 1.

Служитель быв Христу всяческих Владыце, / научил еси люди и просветил еси Божественным Крещением, / к разумению сих наставль, отче Иринее чудне: / темже проповедника ты истины вси именуем, // святителя и угодника Христова.

Слава, и ныне, праздника, глас тойже:

Всечестный лик премудрых апостол собрася, / чудно погребсти славно тело Твое пречистое, Богородице Всепетая. / С нимиже воспеша и Ангел множество, // преставление Твое честно хваляще, еже верою празднуем.

По 2-й стихологии седален, глас 3:

Подъял еси подвиги постническия / и апостольскую благодать стяжал еси, / достоблаженне отче Иринее, / Темже и ныне не

отрини нас от твоего заступления, // любовьию
восхваляющих тя.

Слава, и ныне, праздника, глас тойже:

В рождестве Твоем зачатие безсеменное, / во
успении Твоем мертвость нетленная, / чудо в
чудеси сугубо стечеса, Богородице: / како бо
Неискусомужная Младопитательница чиста
сущи? / Како же Мати Богу мертвоносна
мироухающи? // Темже со Ангелом вопием Ти:
радуйся, Благодатная.

Если изволят совершать полиелей святителю.

По полиелее седален, глас 8:

Преемник апостолов быв и
священнопроповедник чудный, / Божественным
учением Церковь обогащая, / тайнонаучителю
всехвальне Иринее, / и Христово вочеловечение
изъяснил еси / и многи люди светом Истины
просветил еси. / Темже чтим вси верно память
твою, // просящее прияти нам от Бога велию
милость.

Слава, и ныне, Богородичен, глас тойже:

Тя надежду, прибежище и Предстательницу
обретше, вернии, / к Тебе притекаем и
прилежно вопием: / помилуй, Богородице, на Тя
уповающия / и прегрешений оставление нам
испроси // молитвами Твоими, Пречистая.

Таже степенна, 1-й антифон, глас 4.

Прокимен, глас 4: Уста моя возглаголют премудрость, / и поучения сердца моего разум. **Стих:** Услышите сия, вси языцы, / внушите, вси, живущие по вселенней.

Всякое дыхание: Евангелие от Матфея, зачало 11.

По 50-м псалме стихира, глас 6:

Лиона престол украсившаго, / и Божественною мудростию Церковь Христову обогатившаго, / святителя всечестнаго Иринея / хвалебными песнями радостно ублажим, зовуще: / радуйся, страстотерпцев красота и священников славо, // радуйся, апостолов равностоятелю.

Два канона Успению, кир Космы и кир Иоанна. И канон святителю, глас 4.

Песнь 1

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся, светло торжествуя, // и воспою, радуяся, Тоя успение.

Славную память твою вси поем, Иринее всеблаженне, / и песнями почитаем Венчавшаго / твой всечестный верх, Богоблаженне.

Яко мудр, яко чистый храм от Девы Возсиявшаго, Иринее всеславне, / Лиону пастырь чудный явился еси, / люди просвещая светом евангельским.

Зарею просвещаемь, мудре, Трисолнечнаго Сияния, / мглу разорил еси языческаго злословия и, светом твоих словес вся просветив, / ныне прешел еси к незаходимому сиянию.

Богородичен: Святых Святаго Бога родила еси, Всесвятая Дево Марие, / святости всечист храм явльшися и дверь, еюже Един Христос пройде, / спасаай человечество.

Песнь 3

Ирмос: Твоя песнословцы, Богородице, / живой и независтный Источниче, / лик себе совокупльшия, духовно утверди, / в Божественней памяти Твоей // венцев славы сподоби.

Поликарпа, пастыря Смирны всечуднаго красное воспитание / и Богослова Иоанна внуце духовный, Иринее отче блаженне, / яже любовью чествующия твою память светоносную, / житейских избави искушений.

Лучами умнаго осияемь солнца, Иринее всемудре, / от востока устремился еси светло, якоже чувственное солнце, / мрак западный озаряя проповеданием.

Направил еси усердно, Богоблаженне, ум твой повелением Спасовым, / по достоинству был еси Того Церкви пастырь изряден.

Богородичен: Рождши на земли пребогатаго

Бога, Дево Всечистая, / человеческое падение
на Небеса возвела еси.

Кондак святителю, глас 6:

В Дусе и истине / Троицу Святую почитая, / о
преславне священномучениче Иринее, / слова
Апостольская во уме держа, / созидающею души
любовию / суетнаго разума кичащаго /
отвратился еси, / и пустым и лжи исполненным
/ еретическим измышлением противуста, / тако
и овцы стада Христова / сквернаго недуга
еретическаго / удержи и сохрани. / Сего ради,
Триединаго Бога хвалящее, / песньми тя
прославляем // яко блаженнаго миротворца.

Седален, глас 8:

Явился еси, отче, Церкви и граду твоему, /
якоже другое солнце, / озаряя сих молниями
Божественных словес твоих, // яко ученик
Господень, Иринее всечестне.

Ипакои, глас 8:

Блажим Тя, вси роди, Богородице Дево, / в Тя
бо Невместимый Христос Бог наш вместится
благоволи. / Блажени есмы и мы,
предстательство Тя имуще: / день бо и ношь
молишися о нас / и роди христианстии Твоими
молитвами утверждаются. / Тем, воспевающе,

вопием Ти: // радуйся, Благодатная, Господь с Тобою.

Песнь 4

Ирмос: Неизследный Божий Совет, / еже от Девы воплощения / Тебе, Вышняго, пророк Аввакум усмотря, зовяше: // слава силе Твоей, Господи.

Демонская капища твоим мужеством сокрушил еси, страсотерпче, / храм тебе самага Святаго Духа и терпения неложнаго столп и образ показал еси.

Весь вземся, Богоносе, мыслию к Небесем и Божественную славу видел еси мысленно неизреченную, / темже и равноангелен на земли явился еси, Иринее всечестне.

Словесами и писаньми премудрыми паству твою наставляя еси, отче прехвальне, / и до ныне проповедаеши Спасово пришествие и воскресение, / люди просвещая Богодухновенными труды своими.

Богородичен: Просвети, Марие Чистая, омраченную душу мою светом Твоим, / яже Свет миру рождшая Присносущный.

Песнь 5

Ирмос: Ужасошася всяческая / о честнем успении Твоем: / Ты бо, Неискусобрачная Дево,

/ от земли преставилася еси к вечным обителем
/ и к безконечной жизни, / всем, воспевающим
Тя, // спасение подавающая.

Возвышен явился еси страдания честными,
священнейше, / и приял еси венцы победы,
мудре, и вечное получил еси радование, / тем ты
почитаем, отче иерарше Иринее.

Смирнен сердцем и кроток и всем свят был еси,
/ повелению Христову последствуя, отче наш
Иринее, / темже вселися в ты Божий Дух и
премудрость, еюже просвети нас.

Евангелия Твоего, Христе, возвестителя, /
святителя Иринея днесь славяще, / державу
Твою славословим, Господи, / грехов оставление
просяще и недугов исцеление.

Богородичен: Велие и страшное таинство
рождества Твоего, Чистая, ум удивляет: / яко
Бог вочеловечится из Тебе благостию изволи /
во спасение мира и обновление.

Песнь 6

Ирмос: Божественное сие и всечестное /
совершающе празднество, / Богомудрии,
Богоматере, / приидите, руками восплецим, /
от Нея рождшагося Бога славим.

Благообразно ходя, блаженне, / чадо же света и
мира являясь, / Пофина всехавльнаго святителя
и мученика престол наследил еси, / Лиону быв

пастырь изряден.

Яко звезда пресветлая возсиял еси людем галльским, отче Иринее Богомудре, / словес светлостию и жития чистотою просвещая / верою и любовию к тебе притекающия.

Богородичен: Милости Твоя, Богородице, сподоби мя, премилостиваго Спаса рождшая, / Своею кровию от смерти вечныя человеки избавльшаго.

Кондак Успению, глас 2:

В молитвах Неусыпающую Богородицу / и в предстательствах непреложное упование / гроб и умерщвление не удержаста: / якоже бо Живота Матерь к животу престави // во утробу Вселивыйся приснодевственную.

Икос:

Огради моя помышления, Христе мой, / ибо Стену мира воспети дерзаю, Чистую Матерь Твою, / на столпе глагол укрепи мя и в тяжких мыслех заступи мя, / Ты бо взывающим и просящим верою моления исполнявши. / Ты мне убо даруй язык приносен и помысл непостыден: / всякое бо даяние сияния от Тебе низпосылается, Светоподателю, // во утробу вселивыйся приснодевственную.

Песнь 7

Ирмос: Не послужиша твари Богомудрии, / паче
Создавшего, / но, огненное прещение мужески
поправше, / радовахуся, поюще: // препетый
отцев Господь и Бог, благословен еси.

Научаемы, отче, словеса твоими, / всяку
побеждаем скверную ересь / и Отцу и Духу
совечному, Слову воплотившемуся взываем: /
препетый отцев Господь и Бог, благословен еси.

Просвещенная зарею Святыя Троицы, Иринею
отче Богоблаженне, / тьму прелести отгнал еси и
славу улучил еси, песнопюще: / препетый отцев
Господь и Бог, благословен еси.

Блажен еси, и добро тебе есть, / ныне
всельшемуся, идеже праведных селения, /
идеже мучеников воинства, / идеже мудрых
апостолов лица взывают: / препетый отцев
Господь и Бог, благословен еси.

Богородичен: Гавриилово благовестие
услышавши, Марие Чистая, / прияла еси
благоволение Отчее и Духа нашествие, / и
родила еси Христа — Слово воплощенное,
радуясь и вопиючи: / препетый отцев Господь
и Бог, благословен еси.

Песнь 8

Ирмос: Отроки благочестивый в пещи /
Рождество Богородичо спасло есть, / тогда убо

образуемое, / ныне же действуемое, / вселенную всю воздвизает пети Тебе: / Господа пойте, дела, // и превозносите Его во вся веки.

Заколение благовонно сам себе принесл еси, мудре, / в Божественный и неприступный жертвенник Божий вшед с кровию твоею, поя своему Владыце: / Господа пойте, дела, и превозносите Его во вся веки.

Светоносный твой праздник, Иринее преподобне, / исполняет радости и веселия духовнаго, благоухания же и просвещения / тя имущих заступника и Богу вопиющих: / Господа пойте, дела, и превозносите Его во вся веки.

Троичен: Яко Единицу естеством, Тя пою, Божество Всесвятое, / в триех ипостасях Единого Создателя, радуясь зову: / Господа пойте, дела, и превозносите Его во вся веки.

Богородичен: Слово Отца Небеснаго Единосущное, / Адамово избавление от кровей Твоих девственных воплотися, Дево Марие Чистая, / Егоже славословяще зовем: / Господа пойте, дела, и превозносите Его во вся веки.

Песнь 9

Ирмос: Всяк земнородный / да взыграется, Духом просвещаемь, / да торжествует же Безплотных умов естество, / почитающее священное преставление Богоматере, / и да

вопиет: / радуйся, Всеблаженная Богородице,
// Чистая Приснодево.

С Вышними Ангелы ликуя, и святыми, и
преподобными, / о иже верою чтущих тя и
восхваляющих, отче Иринее, / Благодетеля
Господа непрестанно моли.

Смирна хвалится тя воспитавшая, доблий
Господень страдальче Иринее, / наипаче же
Лион ликует, многострадальное твое тело держа,
/ яко богатство истинное, и источник
исцелений, и недугов очистилице.

Светоносная твоя, отче, возсиявши память, /
просвещает души благочестно сию
совершающих, / и причастники Божественного
светоявления сия соделывает. / Юже достойно,
Богомудре, песньми ублажаем.

Богородичен: Глас Тебе ангелов, Пречистая,
вопием: / радуйся, спасение всех человеков / и
славных мучеников Божественное венчание.

Светилен:

Предстоящи ныне Трисиянному Великому Свету
/ и пребывающи в неизреченней светлости со
всеми святыми, / помяни всех нас, Иринее
всесвященне, / память твою светоносно
совершающих.

Светилен праздника.

Подобен: Учеником зрящим:

От земли на Небеса преставльшися, / Твоего наследия, Чистая, не остави: / роди христианстии утверди, языки укроти, / и пролей мир в концы мира.

На хвалитех стихиры праздника 3
и святителю 3.

Стихиры Успению, глас 4:

В славном успении Твоем Небеса радуются, / и ангельская возрадовашася воинства, / вся же земля веселится, / песнь Тебе исходную провозглашаючи Матери Владычествующего всеми, / Неискусобрачная Пресвятая Дево, / Яже род человеческий избавльшая // прародительнаго осуждения.

От конец стекошася апостолов лучший, / богоначальным мановением, погребсти Тя, / и от земли вземлему Тя к высоте зряще, / глас Гавриилов радостию вопияху Тебе: / радуйся, Носило Божества всего. / Радуйся, Единая, земная с Вышними // Рождеством Твоим соединившая.

Яже Живот рождшая, / к жизни преминала еси безсмертней / честным успением Твоим, / дориносящим Тя Ангелом, / Началом и Силам, / апостолом и пророком и всей твари, / приемшу

же нетленными дланьми Сыну Твоему /
непорочную душу Твою, // Дево Мати
Богоневесто.

Стихиры святителю, глас 8:

Яко священника превеликаго и апостолов
совсельника, / Церковь верных почитает тя,
Иринее: / юже твоими молитвами соблюдай,
блаженне, // непобедиму и необуреваему
наветами лукаваго.

Светлостьми добродетельными / на земли
прославися имя твое, / столп и утверждение был
еси, отче Иринее, / души верных укрепляя и
тьму греховную отгоняя. / Темже, светоносную
твою память празднующе днесь, взываем: //
моли спастися душам нашим.

Словесы просветил еси церковное исполнение, /
житием и чудесами просиял еси миру, /
Богоносе отче Иринее, / к Свету невечернему
прешел еси, радуяся: / Темже твое светоносное
торжество совершаем, // благочестием твоим
осияеми.

Слава, глас тойже:

Приял еси в сердце твоём огонь Божественнаго
Духа / и привел еси себе Христу, яко всеплодие
одушевлено / и жертву благоприятную и
пречистую, / отче Иринее всечестне, /

МОЛИТВАМИ ТВОИМИ НАСТАВИ НАС // ЕВАНГЕЛЬСКИМ ПУТЕМ ДОБРОДЕТЕЛЬНО ХОДИТИ.

И ныне, Успению, глас 5:

Воспойте, людие, / Матери Бога нашего, воспойте: / днесъ бо всесветлую душу Свою в пречистыя длани / Иже из Нея Воплощшагося без семене предает, / Егоже и молит непрестанно // даровати вселенней мир и велию милость.

Славословие великое и отпуст.

[Выкладываю в «Уставные заметки» текст полиелейной службы священномученику Иринею, епископу Лугудунскому (Лионскому), составленной клириком Одесской епархии Украинской Православной Церкви протоиереем Илией Тетерько.]

